

# *Nameya Yûhenna ya pêşî*

## *Pêşgotin*

Nivîskarê vê nameyê bi xwe navê xwe nade, lê belê li gor şahidên sedsala pêşî nivîskarê vê nameyê Yûhenna ye. Nameyên Yûhenna gelek dimînin Mizgîniya Yûhenna, loma bawermend hê ji serî ve wusa qebûl dikin ku ev hemû ji aliyê eynî Yûhennayî ve hatine nivîsîn. Yûhenna ev name di dawiya sedsala pêşî de, li Efesê nivîsiye.

Du armancên bingehî yên vê nameyê hene:

1. Ew xwendevanan bizirav dike, da ku di hezkirina Xwedê û Kurê wî Îsa Mesîh de bimînin.
2. Ew li hember hîndariyên şaş ên ku dikarin vê girêdanê xera bikin, wan hişyar dike.

Li gor dîtina wan mamosteyên derewîn, her tiştê ku li vê dinyayê li ber çav e, ew xerab e; li gor wan tenê tiştên ruhanî qenc in û tiştên ruhanî û fîzîkî jî nikarin bîn ba hev û bibin yek. Ji ber vê yekê wan nedixwest ku bawer bikin ku Îsa Kurê Xwedê ye û bi xwîn û goşt hatiye dinyayê. Nivîskar li hember vê nêrîna şaş bi eşkereyî nîşan dide ku Îsa Mesîh tam mirov û tam Xwedê bû.

Yûhenna gelek caran tîne bîra bawermendan ku ji Xwedê û ji hevdû hez bikin.

Ev name dikare bi vî awayî bê beşkirin:

I. Destpêk 1:1-4

II. Ronahî û tarî 1:5-2:29

III. Zarokên Xwedê û zarokên Îblîs 3:1-24

IV. Rastî û şaşî 4:1-6

V. Hezkirina Xwedê û birahezî 4:7-21

VI. Serketina baweriyê 5:1-21

## *Peyva Jiyane*

**1** Ev Peyva\* ku em bi we didin bihîstin, Peyva jiyane ye. Ew ji destpêkê ve hebû, me bihîstiye, me bi çavên xwe dîtîye, me lê nêriye û dest daye wê. <sup>2</sup> Ev jiyana xuya bû, me ew dît û em jê re

şahidiyê dikin û em wê jiyana herheyî ya ku bi Bav\* re bû û ji me re xuya bû, bi we didin zanîn. <sup>3</sup> Tiştê ku me dîtiye û bihîstiye, em bi we jî didin zanîn, da ku hevpariya we jî bi me re hebe. Bi rastî hevpariya me bi Bav\* û bi Kurê wî Îsa Mesîh re ye. <sup>4</sup> Em van tiştan ji we re dinivîsin, da ku şahiya me tamam be.

### *Xwedê Ronahî Ye*

<sup>5</sup> Tiştê ku me ji wî bihîstiye û peyva\* ku em dixwazin bi we bidin bihîstin ev e: Xwedê ronahî ye û li ba wî qet tarî tune. <sup>6</sup> Eger em bêjin: «Hevpariya me bi wî re heye» û hê jî em di tariyê de rêve herin, em derewan dikin û li gor rastiye nakin. <sup>7</sup> Lê eger em di ronahiyê de rêve herin, wek ku ew di ronahiyê de ye, hevpariya me bi hevdû re heye û xwîna Kurê wî Îsa, me ji her gunehî paqij dike.

<sup>8</sup> Eger em bêjin: «Gunehê me tune», em xwe dixapînin û rastî bi me re tune. <sup>9</sup> Lê eger em gunehên xwe eşkere bikin, ew dilsoz û rastîparêz e ku li gunehên me bibihûre û me ji her neheqiyê paqij bike. <sup>10</sup> Eger em bêjin: «Me guneh nekiriye», em wî derewker dikin û peyva wî bi me re tune.

### *Mehdervanê Me Mesîh*

**2** Zarokên min ên delal, ez van tiştan ji we re dinivîsim, da ku hûn guneh nekin. Lê eger yek guneh bike, li ba Bav\*, mehdervanê\* me Îsa Mesîhê rastdar heye. <sup>2</sup> Ew ji bo gunehên me berdêla lêbihûrtinê ye; ne tenê ji bo yên me, lê ji bo gunehên hemû dinyayê jî.

<sup>3</sup> Eger em emrên wî bînin cih, bi vê yekê em dizanin ku em wî nas dikin. <sup>4</sup> Yê ku bêje: «Ez wî nas dikim», lê emrên wî neyne cih, derewkar e û li ba wî rastî tune. <sup>5</sup> Lê kî ku gotina wî bigire, bi rastî hezkirina Xwedê li ba wî tamam bûye. Bi vê em dizanin ku em bi wî re ne: <sup>6</sup> Yê ku bêje: «Ez bi wî re dimînim», divê wek ku Îsa rêve çûye, ew jî rêve here.

### *Emrê Nû*

<sup>7</sup> Hezkirîno, ne ku ez emrekî nû ji we re dinivîsim, lê ez wî emrê kevin ê ku we ji destpêkê ve dizanibû, dinivîsim. Emrê kevin

ew peyv e ya ku we bihîstiyê. <sup>8</sup> Dîsa jî ez emrekî nû ji we re dini-  
vîsim. Rastiya wî hem li ba wî û hem li ba we xuya ye. Çimkî tarî  
derbas dibe û ronahiya rastîn ji xwe şewq dide.

<sup>9</sup> Yê ku bêje: «Ez di ronahiyê de me» û ji birayê xwe nefret  
bike, hê jî ew di tariyê de ye. <sup>10</sup> Yê ku ji birayê xwe hez dike, di  
ronahiyê de dimîne û ji bo wî sedemê terpilînê\* tune. <sup>11</sup> Lê yê ku ji  
birayê xwe nefret dike, di tariyê de ye, di tariyê de rêve diçe û  
nizane ku diçe ku derê, çimkî tariyê çavên wî kor kirine.

<sup>12</sup> Zarokên min, ez ji we re dinivîsim,

Çimkî di ber navê wî de li gunehên we hatiye bihûrtin.

<sup>13</sup> Bavno, ez ji we re dinivîsim,

Çimkî hûn, yê ji destpêkê ve heyî nas dikin.

Xortno, ez ji we re dinivîsim,

Çimkî hûn li hember Yê Xerab bi ser ketin.

<sup>14</sup> Zaron, ez ji we re dinivîsim,

Çimkî hûn Bav\* nas dikin.

Bavno, ez ji we re dinivîsim,

Çimkî hûn, yê ji destpêkê ve heyî nas dikin.

Xortno, ez ji we re dinivîsim,

Çimkî hûn bi hêz in û peyva Xwedê bi we re dimîne

Û hûn li hember Yê Xerab bi ser ketin.

<sup>15</sup> Ji dinyayê û tiştên ku di dinyayê de ne, hez nekin. Eger yek  
ji dinyayê hez bike, hezkirina Bav\* bi wî re tune. <sup>16</sup> Çimkî her tiştê  
ku di dinyayê de ye, xwesteka nefsê, xwesteka çavan û quretiya  
maldariyê, ne ji Bav, lê ji dinyayê ne. <sup>17</sup> Îcar dinya û xwesteka wê  
derbas dibe, lê yê ku daxwaza Xwedê dike her û her dijî.

### *Dijminên Mesîh*

<sup>18</sup> Zaron, saeta dawî ye! Wek ku we bihîstiyê, yê ku dijberê  
Mesîh e wê bê û niha jî gelek dijberên Mesîh derketine. Ji wê yekê  
em dizanin ku saeta dawî ye. <sup>19</sup> Ew ji nav me derketin, lê belê ew  
ne ji me bûn. Eger ew ji me bûna, wê bi me re bimana. Lê çûna  
wan diyar kir ku ew hemû ne ji me ne.

<sup>20</sup> Lê hûn ji aliyê Yê Pîroz ve bi Ruh hatine meshkirin\* û hûn  
hemû jî rastiye dizanin. <sup>21</sup> Ne ji ber ku hûn rastiye nizanin ez ji we

re dinivîsim, lê ji ber ku hûn dizanin. Û hûn dizanin ku her derew ne ji rastiye ye. <sup>22</sup> Ji ye ku dibêje: «Îsa ne Mesîh e» pê ve, kî derewkar e? Dijberê Mesîh ew e ku hem Bav û hem jî Kur înkâr dike. <sup>23</sup> Di dilê her kesê ku Kur înkâr dike de, Bav jî tune, lê di dilê ye ku Kur eşkere dike de, Bav jî heye.

<sup>24</sup> Bila tiştê ku we ji destpêkê ve bihîstiye, bi we re bimîne. Eger tiştê ku we ji destpêkê ve bihîstiye bi we re bimîne, hûn jî, hûnê bi Kur re û bi Bav re bimînin. <sup>25</sup> Îcar ev soza ku wî daye me jiyana herheyî ye.

<sup>26</sup> Mîn ev tişt li ser wan ên ku dixwazin we bixapînin ji we re nivîsîn. <sup>27</sup> Îcar heçî hûn in, ew Ruhê ku Mesîh hûn pê mesh\* kirine bi we re dimîne û hewcedariya we bi hînkirina tu kesî tune. Çimkî mesha wî, li ser her tiştî çawa hînê we bike, rast e, ne derew e û çawa hînê we kiribe, bi Mesîh re bimînin.

<sup>28</sup> Û niha, zarono, bi wî re bimînin, da ku gava ew xuya bibe, cesareta me hebe û em di hatina wî de, li ber wî şermî nebin. <sup>29</sup> Madem ku hûn dizanin ew rast e, hûn dizanin her kesê ku rastiye dike ji wî çêbûye.

### *Zarokên Xwedê*

**3** Binêrin, Bav\* çiqas ji me hez kir ku em zarokên Xwedê bê n gazîkirin! Û em ew in. Ji ber vê yekê dinya me nas nake, çimkî ew nas nekir. <sup>2</sup> Hezkirîno, niha em zarokên Xwedê ne û hê ne eşkere ye ku emê bibin çî. Lê em vê yekê dizanin: Gava ku ew xuya bibe, emê bibin wek wî. Çimkî ew çawa be, emê wî wusa bibînin. <sup>3</sup> Her kesê ku hêviya xwe bi wî ve girêdide, wek ku ew paqij e, xwe paqij dike.

<sup>4</sup> Her kesê ku guneh dike, li hember Şerîetê\* radibe; çimkî guneh li hember Şerîetê rabûn e. <sup>5</sup> Hûn dizanin ku ew xuya bû, da ku guneh rake; û li ba wî guneh tune. <sup>6</sup> Her kesê ku bi wî re dimîne, guneh nake; her kesê ku guneh dike, ne ew dîtiye û ne jî ew nas kiriye.

<sup>7</sup> Zarono, bila kes we nexapîne. Ye ku rastiye dike rast e, çawa ku ew rast e. <sup>8</sup> Ye ku guneh dike ji Îblîs e, çimkî Îblîs ji destpêkê ve guneh dike. Ji bo vê yekê Kurê\* Xwedê xuya bû, da ku karên Îblîs xera bike.

---

3:1 Yûhenna 1:12

3:5 Yûhenna 1:29

<sup>9</sup> Her kesê ku ji Xwedê çêbûye guneh nake, çimkî tovê Xwedê di dilê wî de dijî û ew nikare guneh bike, ji ber ku ew ji Xwedê çêbûye. <sup>10</sup> Zarokên Xwedê û zarokên Îblîs bi vê yekê ji hev kifş dibin: Her kesê ku rastiye nake ne ji Xwedê ye û yê ku ji birayê xwe hez nake jî ne ji Xwedê ye.

### *Ji hevdû Hez Bikin*

<sup>11</sup> Çimkî gotina ku we ji destpêkê ve bihîstiyê ev e ku em ji hevdû hez bikin. <sup>12</sup> Em ne wek Qayîn\* bin ê ku ji Yê Xerab bû û birayê xwe kuşt. Û çima wî ew kuşt? Ji ber ku kirinên wî bi xwe xerab bûn, lê yê birayê wî rast bûn.

<sup>13</sup> Gelî birayan, eger dinya ji we nefret bike, şaş nemînin. <sup>14</sup> Em dizanin ku em ji mirinê gihîştine jiyane, çimkî em ji birayan hez dikin. Yê ku hez nake di mirinê de dimîne. <sup>15</sup> Her kesê ku ji birayê xwe nefret dike, mêrkuj e û hûn dizanin ku jiyana herheyî bi tu mêrkujî re tune.

<sup>16</sup> Em hezkirinê bi vê yekê dizanin: Îsa canê xwe di ber me de da û divê em jî di ber birayan de canê xwe bidin. <sup>17</sup> Eger malê dinyayê bi kesekî re hebe û birayê xwe di rewşeke hewcedar de bibîne û dilê wî pê neşewite, çawa hezkirina Xwedê di dilê wî de dimîne?

<sup>18</sup> Zaron, ne bi gotinê û peyvê, lê bi kirinê û rastiye em hez bikin. <sup>19</sup> Û bi vê yekê emê bizanin ku em ji rastiye ne û li ber wî emê dilê xwe rihet bikin. <sup>20</sup> Eger dilê me, me sûcdar derxe, Xwedê ji dilê me meztir e û ew her tiştî dizane.

<sup>21</sup> Hezkirîno, eger dilê me, me sûcdar dernexe, li ber Xwedê cesareta me heye <sup>22</sup> û em her çî bixwazin emê jê bistînin. Çimkî em emrên wî tînin cih û em tiştên ku li wî xweş tên dikin. <sup>23</sup> Emrê wî ev e ku em baweriya\* xwe bi navê Kurê wî Îsa Mesîh bînin û ji hevdû hez bikin, wek ku wî li me emir kiriye. <sup>24</sup> Yê ku emrên wî tîne cih, bi Xwedê re dimîne û Xwedê jî bi wî re dimîne. Em bi vê yekê dizanin ku ew bi me re dimîne: Bi Ruhê ku daye me.

### *Ceribandina Ruh*

**4** Hezkirîno, ji her ruhî bawer\* nekin, lê ruhan biceribînin ka ew ji Xwedê ne an ne. Çimkî gelek pêxemberên derewîn derketin

dinyayê. <sup>2</sup> Hûn bi vê yekê Ruhê\* Xwedê nas dikin: Her ruhê ku eşkere dike, Îsa Mesîh bi xwîn û goşt hatiye, ji Xwedê ye, <sup>3</sup> lê her ruhê ku Îsa eşkere nake, ne ji Xwedê ye. Û ruhê dijberê Mesîh ê ku we li ser bihîstiyê wê bê, ev e û ji xwe niha di dinyayê de ye.

<sup>4</sup> Zarono, hûn ji Xwedê ne û hûn li hember pêxemberên derewîn bi ser ketin. Çimkî yê ku bi we re ye, ji yê ku di dinyayê de ye meztir e. <sup>5</sup> Ew ji dinyayê ne, ji ber vê yekê gotina wan ji dinyayê ye û dinya guhdariya wan dike. <sup>6</sup> Em ji Xwedê ne. Yê ku Xwedê nas dike guhdariya me dike, lê yê ku ne ji Xwedê ye guhdariya me nake. Em bi vê yekê Ruhê rastiyê û ruhê derewîn nas dikin.

### *Xwedê Hezkirin e*

<sup>7</sup> Hezkirîno, em ji hevdû hez bikin; çimkî hezkirin ji Xwedê ye û her kesê ku hez dike, ji Xwedê çêbûye û Xwedê nas dike. <sup>8</sup> Yê ku hez nake, Xwedê nas nake, çimkî Xwedê hezkirin e. <sup>9</sup> Hezkirina Xwedê bi vê yekê di nav me de xuya bû: Xwedê Kurê xwe yê yekta şand dinyayê, da ku em bi wî bijîn. <sup>10</sup> Hezkirin ev e, ne ku me ji Xwedê hez kir, lê wî ji me hez kir û Kurê xwe şand, ku di ber gunehên me de bibe berdêl.

<sup>11</sup> Hezkirîno, madem ku Xwedê bi vî awayî ji me hez kir, divê em jî ji hevdû hez bikin. <sup>12</sup> Tu caran, tu kesî Xwedê nedîtiye; eger em ji hevdû hez bikin, Xwedê bi me re dimîne û hezkirina wî bi me re bêkêmahî dibe.

<sup>13</sup> Bi vê yekê em dizanin ku em bi wî re dimînin û ew bi me re dimîne, çimkî wî ji Ruhê xwe daye me. <sup>14</sup> Me dît û em şahidiyê dikin ku Bav\* Kurê xwe şand ku bibe Xilaskarê dinyayê. <sup>15</sup> Eger yek bi eşkereyî bêje: «Îsa Kurê\* Xwedê ye», Xwedê bi wî re dimîne û ew jî bi Xwedê re dimîne. <sup>16</sup> Û em hezkirina Xwedê ya ku ji bo me ye dizanin û jê bawer dikin.

Xwedê hezkirin e û yê ku di hezkirinê de dimîne, bi Xwedê re dimîne û Xwedê bi wî re dimîne. <sup>17</sup> Hezkirin bi vî awayî di nav me de tamam bûye, da ku di Roja Dawî de cesareta me hebe, çimkî ew çawa be, li vê dinyayê em jî wusa ne. <sup>18</sup> Di hezkirinê de tirs tune, lê hezkirina tamam tirsê ji dil derdixe; çimkî di tirsê de cefa heye û yê ku ditirse di hezkirinê de bêkêmahî nebûye.

<sup>19</sup> Em hez dikin, çimkî pêşî wî ji me hez kir. <sup>20</sup> Eger yek bêje: «Ez ji Xwedê hez dikim» û ji birayê xwe nefret bike, derewkar e. Çimkî yê ku ji birayê xwe yê ku dibîne hez neke, nikare ji Xwedê ku nabîne hez bike. <sup>21</sup> Emrê ku me jê standiye ev e: Yê ku ji Xwedê hez dike, bila ji birayê xwe jê hez bike.

### *Bawerî li hember Dinyayê Bi Ser Dikeve*

**5** Her kesê ku bawer dike ku Îsa, Mesîh e, ji Xwedê çêbûye û her kesê ku ji Bav\* hez dike, ji zarokê Bav jê hez dike. <sup>2</sup> Çaxê ku em ji Xwedê hez bikin û emrên wî pêk bînin, hingê em dizanin ku em ji zarokên Xwedê hez dikin. <sup>3</sup> Çimkî hezkirina Xwedê ev e, ku em emrên wî bînin cih. <sup>4</sup> Emrên wî ne giran in. <sup>5</sup> Çimkî her kesê ku ji Xwedê çêbûye li hember dinyayê bi ser dikeve. <sup>6</sup> Bi vî awayî em li hember dinyayê bi ser dikevin, yanî bi baweriya xwe. <sup>7</sup> Ji wî yê ku bawer dike ku Îsa Kurê Xwedê ye pê ve, kî li hember dinyayê bi ser dikeve?

### *Şahidiya li ser Îsa Mesîh*

<sup>6</sup> Ev, ew e ku bi av û xwînê hat, Îsa Mesîh, ne tenê bi avê, lê bi av û xwînê hat. <sup>7</sup> Û Ruh e ku şahidiyê dike; çimkî Ruh rastî ye. <sup>8</sup> Yên ku şahidiyê dikin sisê ne: <sup>9</sup> Ruh, av û xwîn. <sup>10</sup> Û şahidiya her siyan yek e. <sup>11</sup> Eger em şahidiya mirovan qebûl bikin, şahidiya Xwedê hê meztir e; çimkî ev, şahidiya Xwedê ya li ser Kurê wî ye. <sup>12</sup> Yê ku baweriyê bi Kurê Xwedê tîne, ev şahidî di dilê wî de ye. <sup>13</sup> Yê ku ji Xwedê bawer nake, wî ew derewker kiriye, çimkî wî bawerî bi şahidiya ku Xwedê ji bo Kurê xwe kiriye, neaniye. <sup>14</sup> Şahidî ev e: Xwedê jiyana herheyî daye me û ev jiyana di Kurê wî de ye. <sup>15</sup> Yê ku Kur di dilê wî de ye, jiyana wî heye, yê ku Kurê Xwedê di dilê wî de tune, jiyana wî tune.

### *Peyva Dawî*

<sup>13</sup> Ez van tiştan ji we re, ji hûn ên ku baweriyê bi navê Kurê Xwedê tînin re, dinivîsim, da ku hûn bizanin jiyana we ya herheyî heye. <sup>14</sup> Cesareta me ya li ber wî ev e: Çaxê em tiştêkî li gor daxwaza wî bixwazin, ew guhê xwe dida me. <sup>15</sup> Û eger em bizanin ku

em her çî bixwazin ew guh dide me, hingê em dizanin tiştên ku me jê xwestine, me standine.

<sup>16</sup> Eger yek bibîne ku birayê wî gunehê ku nabe mirinê dike, bila ji Xwedê bixwaze û wê jîyanê bide wî yê ku gunehê ku nabe mirinê kiriye. Gunehê ku dibe mirinê heye; ez nabêjim bila ji bo gunehê weha dua bike. <sup>17</sup> Her neheqî guneh e; lê gunehê ku nabe mirinê heye.

<sup>18</sup> Em dizanin her kesê ku ji Xwedê çêbûye guneh nake, lê Nixuriyê Xwedê wî diparêze û Yê Xerab dest nade wî. <sup>19</sup> Em dizanin ku em ji Xwedê ne û tevahiya dinyayê di bin desthilatiya Yê Xerab de ye.

<sup>20</sup> Em dizanin ku Kurê Xwedê hatiye û ji bo ku em Yê Rast bizanin, fêmdarî daye me. Û em bi Yê Rast re, bi Kurê wî Îsa Mesîh re ne. Xwedayê rast û jiyana herheyê ev e.

<sup>21</sup> Zarono, xwe ji pûtan biparêzin.

# *Nameya Yûhenna ya diduyan*

## *Pêşgotin*

*Yûhenna vê nameya xwe wek «berpirsiyarê civînê, ji sitiya hêja û zarokên wê» re dinivîse (ku bi mana civîna derekê û bawermendên wê ye). Armanca esasî ya vê nameyê, hezkirina bawermendan a ji hevdû û li hember hîndariyên şaş hişyarkirina wan e.*

*Ev name dikare bi vî awayî bê beşkirin:*

*I. Silav 1-3*

*II. Rastî û hezkirinê 4-11*

*III. Gotinên dawî 12-13*

## *Silav*

Ji vî rihspiyî,

ji sitiya\* bijartî û zarokên wê re, ji yên ku ez bi rastiye ji wan hez dikim re. Ne tenê ez, lê hemû yên ku rastiye dizanin jî ji wan hez dikin. <sup>2</sup> Çimkî rastî di dilê me de dimîne û wê her û her bi me re be:

<sup>3</sup> Rehm, kerem û aşî ji Bav Xwedê û ji Kurê Bav Îsa Mesîh, di rastî û hezkirinê de wê li ser me be.

## *Rastî û Hezkirin*

<sup>4</sup> Bi dîtina hin zarokên te yên li gor emrê ku me ji Bav\* standiye, di rastiye de rêve diçin, ez gelek şa bûm. <sup>5</sup> Lê niha, sitiya delal, ne wek ku emrekî nû ez ji te re dinivîsim, lê li gor emrê ku ji destpêkê ve li me hatiye kirin, ez ji te hêvî dikim ku em ji hevdû hez bikin. <sup>6</sup> Îcar hezkirin ev e ku em li gor emrên wî rêve herin. Wek ku we ji destpêkê ve bihîstiye, emir ev e ku hûn di hezkirinê de rêve herin.

<sup>7</sup> Gelekên ku xelkê dixapînin, li dinyayê belav bûn. Ew eşkere nakin ku Îsa Mesîh bi xwîn û goşt hatiye. Yê ku xapînok e û dijberê Mesîh e, ev e. <sup>8</sup> Hay ji xwe hebin, da ku hûn tiştê ku we di ber de keda xwe daye winda nekin, lê xelata xwe bi tevahî bistînin.

<sup>9</sup> Her kesê ku zêde diçe û di hînkirina Mesîh de namîne, di dilê wî de Xwedê tune. Di dilê wî yê ku di hînkirina Mesîh de dimîne, hem Bav\* û hem jî Kur\* heye. <sup>10</sup> Eger yek bê ba we û vê hînkirinê neyne, wî nehewînin malê û silavê nedinê. <sup>11</sup> Çimkî, kî silavê bide wî, dibe hevparê kirinên wî yên xerab.

***Gotinên Dawî û Silav***

<sup>12</sup> Hê gelek tiştên ku ez ji we re binivîsim hene, lê min nexwest ku ez bi kaxez û bi hibrê binivîsim. Ez hêvî dikim ku ez bêm ba we û rû bi rû bi we re bipeyivim, da ku şahiya me تمام bibe.

<sup>13</sup> Zarokên xwişka te ya bijartî silavan li te dikin.

# ***Nameya Yûhenna ya sisiyan***

## ***Pêşgotin***

*Nameya Yûhenna ya sisiyan ji Gayos re hatiye nivîsîn. Nivîskar di vê nameyê de ji bo ku alîkariya bawermendan kiriye pesnê wî dide û li hember mirovekê bi navê Diyotrefîs bawermendan hişyar dike. Diyotrefîs xwe li ber bawermendan mezin dike, şandîyan qebûl nake û paşgotinîyê dike.*

*Ev name dikare bi vî awayî bê beşkirin:*

*I. Destpêk 1-4*

*II. Fedakariya ji bo birayan 5-8*

*III. Diyotrefîs û Dîmîtriyos 9-12*

*IV. Silavên aştiyê 13-15*

## ***Silav***

Ji yê rihspî,

ji Gayosê hezkiriyê ku ez bi rastî jê hez dikim re.

<sup>2</sup> Hezkiriyê, wek ku canê te di rihetiye de ye, ez dua dikim ku tu di hemû tiştan de di rihetî û di saxiyê de bî. <sup>3</sup> Ez gelek şa bûm çaxê ku çend bira hatin û li ser dilsoziya te ya ji rastiye re şahidî kirin ku tu çawa di rastiye de rêve diçî. <sup>4</sup> Ji bo min, ji vê yeka ku ez dibihîzim zarokên min di rastiye de rêve diçin, şahiyê meztir tune.

## ***Fedakariya ji bo Birayan***

<sup>5</sup> Hezkiriyê, ji birayan re, heta ji yê nenas re, her tiştê ku tu dikî, tu bi dilsozî dikî. <sup>6</sup> Wan li ber civîna\* bawermendan li ser hezkirina te şahidî kir. Îcar tu wan bi awayekî ku hêjayî Xwedê ye bi rê bikî, tê qenc bikî. <sup>7</sup> Çimkî ew ji bo navê Mesîh ketin rê û ji yê ku bawer nakin tiştê nestandin. <sup>8</sup> Loma divê em yê weha qenc qebûl bikin, da ku em ji rastiye re bibin hevalkar.

## ***Diyotrefîs û Dîmîtriyos***

<sup>9</sup> Min ji civînê re hin tişt nivîsîn, lê Diyotrefîsê ku dixwaze xwe di nav wan de derxe pêş, me qebûl nake. <sup>10</sup> Ji ber vê yekê gava

ku ez bê m, ezê balê bikişînim ser wan fesadiyên ku bi peyvên xerab li hember me kirine. Ew qîma xwe bi van fesadiyan tenê nayne, birayan qebûl nake û rê nade wan ên ku qebûl dikin jî. Bi ser de jî, ew wan ji civînê davêje derve.

<sup>11</sup> Hezkiriyo, tu çavê xwe nede tiştê xerab, lê bide tiştê qenc. Yê ku qencyê dike ji Xwedê ye; yê ku xerabiyê dike Xwedê nedîtîye.

<sup>12</sup> Hemû li ser qenciya Dîmîtriyos şahidiyê dikin, heta rastî bi xwe jî şahidiyê dike. Em jî ji bo wî şahidiyê dikin û tu dizanî ku şahidiya me rast e.

### *Silavên Aştiyê*

<sup>13</sup> Gelek tiştên ku ez ji te re binivîsim hene, lê ez naxwazim ku bi kaxez û bi hibrê binivîsim. <sup>14</sup> Lê ez hêvî dikim ku di nêzîk de ezê te bibînim, hingê emê bi hev re rû bi rû bipeyivin.

<sup>15</sup> Aştî li ser te be. Dost silavan li te dikin. Nav bi nav silavan li dostan bike.